

KERATAN AKHBAR

TARIKH : 13 OGOS 2021
AKHBAR : AWANI
MUKA SURAT :

RMK12: Teknologi menyeluruh di semua sektor diperlukan

Fareez Azman

September 13, 2021 14:39 MYT



Ketua Ekonomi Bank Islam, Dr Mohd Afzanizam Abdul Rashid berkata Rancangan Malaysia ke-12 (RMK12) perlu melibatkan dasar dan koordinasi penggunaan teknologi di semua sektor. - Gambar hiasan

KUALA LUMPUR: Penggunaan teknologi perlu diterap dan diamalkan dalam semua sektor ekonomi di negara ini dan tidak terhad untuk sektor tertentu.

Demikian jelas Ketua Ekonomi Bank Islam, Dr Mohd Afzanizam Abdul Rashid yang melihat usaha itu boleh dilipat ganda menerusi Rancangan Malaysia ke-12 (RMK12) yang akan dibentang kerajaan pada hujung September ini.

"Ekonomi negara kita perlukan satu lonjakan yang cepat. Dari sudut ini, peranan teknologi amat penting.

"Kita tahu setiap sektor - tidak kira pertanian, pembuatan dan perkhidmatan, penggunaan teknologi itu perlu ditingkatkan dan ia perlu meluas.

"Contohnya pertanian, ada dua benda iaitu pertanian di ladang dan penghasilan makanan. Dalam konteks teknologi, perlu diberi perhatian supaya kita dapat menghasilkan (kaedah dan produk) pertanian lebih tinggi," katanya ketika ditemu bual *Astro AWANI* pada Isnin.

Justeru jelasnya, peranan kerajaan amat penting dalam merangka dasar dan koordinasi untuk memperluaskan penggunaan teknologi seluruh sektor.

"Yang saya nampak, ada sektor menggunakan teknologi terpilih, mungkin dalam sektor pembuatan berkaitan elektronik dan elektrik. Tapi sektor lain, kadar penerimaan dan penggunaan teknologi berbeza.

"Maka di sini, peranan dasar kerajaan adalah untuk merangka dan mengkoordinasi, supaya penggunaan teknologi dapat dijalankan secara menyeluruh dan kesannya akan dinikmati semua pihak pada masa akan datang," katanya lagi.

Terdahulu, Yang di-Pertuan Agong, Al-Sultan Abdullah Ri'ayatuddin Al-Mustafa Billah Shah bertitah agar kerajaan hendaklah menentukan pelan strategik pembangunan luar bandar dalam RMK12.

Titah baginda, pelan itu perlu meliputi infrastruktur, ekonomi, keusahawan, modal insan dan sistem penyampaian yang dapat dilaksanakan bagi meningkatkan taraf hidup masyarakat luar bandar.